

全上古三代秦漢三國六朝文

全齊文卷二十一

烏程嚴可均校輯

曹虎

虎字士威本名虎頭武帝改下邳人宋泰始末爲直廂累遷屯騎校尉領南城令封羅江縣男除前軍將軍齊受禪除監朔將軍東莞太守改封監利除游擊將軍武帝卽位除員外常侍遷南中郎司馬加監朔將軍南新蔡太守累遷至梁南秦二州刺史征虜將軍鬱林卽位進號前將軍遷冠軍將軍雍州刺史明帝卽位進右將軍尋進平北將軍爵爲侯永泰初遷給事中右衛將軍東昏卽位遷前將軍鎮軍司馬轉散騎常侍右衛將軍未及拜見殺和帝卽位追贈安北將軍徐州刺史

答魏主托跋宏書

自金精失道皇居徙縣喬木空存茂草方鬱七狄交侵五胡代起

顧瞻中原每用弔焉知棄皋隴隨水漣澗伊川之象爰在茲日古
人有云匪宅是上而鄰是上樊漢無幸咫尺殊風折膠入塞乘秋
犯邊親屬窮於斬殺士女困於虔劉與彼齏左共爲唇齒仁義弗
聞苛暴先露乃復改易璽表妄自尊大我皇開運光宅區夏而式
亂逋逃棄同國異每欲出車鞠旅以征不庭所冀干戚兩階叛命
咸格遂復遊魂不戢亂猶孔熾孤總連率任屬方邵組甲十萬雄
戟千羣以此戡難何往不克主上每矜率土哀彼民黎使不戰屈
敵兵無血刃故部勒小戍閉壁清野抗威遵養庶能懷音若遂迷
復知進亡退當金鉦戒路雲旗北掃長驅燕代併躡名王使少卿
忽諸頭曼不祀兵交無遠相爲憫然

南齊書
曹虎傳

虞棕

棕字景豫會稽餘姚人仕宋爲州主簿建平王參軍尚書儀曹
郎太子洗馬領軍長史正員郎累至州治中別駕黃門郎昇明

中武帝爲中軍引爲諮議參軍齊受禪轉太子中庶子遷後軍
長史領步兵校尉鎮北長史監朔將軍南東海太守尋爲豫章
內史遷輔國將軍始興王長史平蠻校尉蜀郡太守轉司徒司
馬遷散騎常侍太子右衛率轉侍中遷祠部尚書出爲冠軍將
軍車騎長史轉度支尚書領步兵校尉鬱林卽位改領右軍將
軍揚州大中正兼大匠卿明帝卽位轉給事中光祿大夫尋加
正員常侍永元元年卒

引疾上表

臣族陋海區身微稽土猥屬興運荷襁稠私徒越星紀終慙報答
衛養乖方抱疾嬰困寢瘳以來候踰旬朔頻加醫治曾未瘳損惟
此朽頓理難振復乞解所職盡療餘辰

南齊書
虞綜傳

胡諧之

諧之豫章南昌人仕宋爲州從事主簿歷臨賀晉熙邵陵王諮

議參軍武帝江州別駕北中郎征虜司馬扶風太守爵關內侯
齊受禪爲給事中驍騎將軍本州中正轉黃門郎領羽林監武
帝卽位轉守衛尉加給事中遷散騎常侍太子右衛率進左衛
將軍都官尙書太子中庶子改衛尉轉度支尙書卒贈右將軍
豫州刺史諡曰簡

上表乞解職

臣私門罪釁早備荼苦兄弟三人共相撫鞠嬰孩抱疾得及成人
長兄臣湛之復早殞沒與亡第二兄臣謨之銜戚家庭得蒙訓長
情同極脰何圖一旦奄見弃放吉凶分違不獲臨奉乞解所職齊書胡諧
之傳

周山文

山文元徽中太學博士入齊爲助教

皇弟訓爲養母服議

案庶母慈已者小功五月鄭立云其使養之命不爲母子亦服庶

母慈已之服恩謂第七皇弟宜從小功之制宋書禮志二元徽二年七月有同奏第七

皇弟訓者母鄭脩容表未詳服制下禮官正議太學博士周山文議

祠孝武皇帝及昭皇太后親執爵議

按禮尊者尊統上卑者尊統下孝武皇帝於至尊雖親非正統而

祖宗之號列於七廟恩謂親奉之日應執觴爵昭皇太后既親非

禮正宜使三公行事宋書禮志四元徽二年十月有司奏至尊親執

爵與否太學博士周山文議

亥日藉田議

盧植云元善也郊天陽也故以日藉田陰也故以辰蔡邕月令章

句解元辰云日幹也辰支也有事於天用日有事於地用辰南齊書禮

志上永明三年助教周山文議

裴叔業

叔業河東聞喜人宋元徽末爲羽林監高帝爲驃騎引爲參軍及受禪除屯騎校尉監朔將軍永明中累遷廣平扶風太守晉熙王冠軍司馬延興初加監朔將軍建武中封武昌縣伯持節冠軍將軍徐州刺史徙輔國將軍豫州刺史東昏侯卽位徙南兖州刺史進冠軍將軍懼誅降於魏尋卒

上疏獻謚言

成都沃壤四塞爲固古稱一人守隘萬夫趨赴雍齊亂於漢世誰李寇於晉代成敗之迹事載前史頃世以來綏馭乖術地惟形勢居之者異姓國實武用鎮之者無兵致寇掠充斥賦稅不斷宜帝子之尊臨撫巴蜀總益梁南秦爲三州刺史率文武萬人先啟嶠漢分遣郡戍皆配精力搜盪山源糾虔姦蠹威令旣行民夷必服

南齊書裴叔業傳

崔慧景

慧景字君山清河東武城人初爲國子學生宋泰始中歷位至
員外郎遷長水校尉監朔將軍昇明初除前軍出爲武陵王安
西司馬河東太守遷豫章王鎮西司馬兼諮議齊受禪封樂安
縣子轉平西府司馬南郡內史仍遷南蠻長史加輔國將軍進
梁南秦二州刺史武帝卽位進號冠軍將軍還遷黃門郎領羽
林監遷隨王東中郎司馬出爲司州刺史徵太子左率加通直
常侍遷右衛將軍加給事中出爲豫州刺史鬱林卽位進號征
虜將軍徵還爲散騎常侍左衛將軍建武中遷度支尚書假節
督雍州加平北將軍東昏卽位改領右衛將軍遷護軍將軍加
侍中尋加平南將軍改授平西將軍征壽陽回軍內向敗死

報薛淵

索在界首遣信拘引已得拔難

南齊書薛淵傳淵母索氏改嫁長安楊氏淵私遣賄賂梁州刺史崔

慧景
報淵

崔覺

覺，慧景子。永元初，爲直閣將軍。慧景敗亡，命爲道人。見執伏誅。

臨刑與妹書

捨逆旅歸其家，以爲大樂。況得從先君遊太清乎？古人有力扛周鼎，而有立錐之歎，以此言死，亦復何傷？平生素心，士大夫皆知之矣。旣不得附驥尾，安得施名於後世？慕古竹帛之事，今皆亡矣。

南齊書崔慧景傳

崔偃

偃，慧景次子。建武初，太學博士。歷始安內史。慧景敗，藏竄得免。和帝西臺立，目爲盜賊將軍，尋下獄死。

上書理父冤

臣竊惟太祖高宗之孝子忠臣，而昏主之賊臣亂子者，江夏王與陞下先臣與鍾軍是也。臣聞堯舜之心，惟以天下爲憂，而不以位。

爲樂彼孑然之舜。望畝之人猶尙若此。況祖業之重。家國之切。江夏既行之於前。陛下又蹈之於後。雖成敗異術。而所由同方也。陛下初登至尊。與天合符。天下纖介之屈。尙望陛下申之。絲髮之冤。尙望陛下理之。況先帝之子。陛下之兄。所行之道。卽陛下所同哉。如此尙弗恤。其餘何幾哉。陛下德侔造化。仁育羣生。雖在昆蟲草木。有不得其所者。覽而傷焉。而況乎友愛天至。孔懷之深。夫豈不懷。將以事割。此實左右不明。未之或詳。惟陛下公聽竝觀。以詢之芻蕘。羣臣有以臣言爲不可。乞使臣延辯之。則天人之意塞。四海之疑釋。必若不然。倖小民之無識耳。使其曉然知此相聚而逃。陛下以責江夏之冤。朝廷將何以應之哉。若天聽沛然同光。發惻愴之詔。而使東牟朱虛。東竊儀父之節。則荷戈之士。誰不盡死。愚竊之言。萬一上合。事乞留中。

南齊書崔慧景傳覺弟偃中興元年詣公博門上書事寢不報

又上疏

近冒陳江夏之冤定承聖詔已有發降此臣狂疏之罪也然臣所以諮問者不得其實罪在萬沒無所復云但愚心所恨非敢以父子之親骨肉之間而僥幸曲陛下之法傷至公之義誠不曉聖朝所以然之意若以狂主雖狂而實是天子江夏雖賢實是人臣先臣奉人臣逆人君以爲不可申明詔得矣然未審陛下亦是人臣不而鎮軍亦復奉人臣逆人君今之嚴兵勁卒方指於象魏者其故何哉臣所不死苟存視息非有他故所以待皇運之開泰申冤魂之枉屈今皇運既已開泰矣而死於社稷盡忠反以爲賊臣何用此生陛下世矣臣聞王臣之節竭智盡公以奉其上居股肱之任者申理冤滯薦達羣賢凡此眾臣夙興夜寐心未嘗須臾之間而不在公故萬物無不得其理而頌聲作焉臣謹案鎮軍將軍臣穎胤宗室之親股肱之重身有伊霍之功荷陛下稷旦之任中領軍臣衍受帷幄之寄副宰相之尊皆所以棟梁朝廷社稷之臣天

下所當遑遑匪懈盡忠竭誠欲使萬物得理而頌聲大興者豈復
宜踰此哉而同知先臣股肱江夏匡濟王室天命未遂王亡與亡
而不爲陛下瞽然一言知而不言是不忠之臣不知而言乃不智
之臣此而不知將何所知如以江夏心異先臣受制臣力則江夏
同致死斃聽可昏政淫刑見殘無道然江夏之異已何爲明孔呂
二人誰以爲戮手御麾幡言輒任公同心共志心若膠漆而以爲
異臣竊惑焉如以先臣遣使江夏斬之則征東之驛何爲見戮陛
下斬征東之使實詐山陽江夏違先臣之情實謀孔矜天命有歸
故事業不遂耳夫唯聖人乃知天命守忠之臣唯知盡死安顧成
敗詔稱江夏遭時屯故跡屈行令內恕探情無玷純節今茲之旨
又何以處鎮軍哉臣所言畢矣乞就湯鑊然臣雖萬沒猶願陛下
必申先臣何則惻愴而申之則天下伏不惻愴而申之天下之人
北面而事陛下者徒以力屈耳先臣之忠有識所知南史之筆千

載可期亦何待陛下屈申而爲褒貶然小臣惓惓之愚爲陛下計耳臣之所言非孝於父實忠於君唯陛下孰察少畱心焉臣頻觸宸嚴而不彰露所以每上封事者非自爲慙地猶以春秋之義有隱諱之意也臣雖淺薄然今日之事斬足斷頭殘身滅形何所不能爲陛下耳臣聞生人之死肉人之骨有識之士未爲多感公聽竝觀申人之冤秉德任公理人之屈則普天之人爭爲之死何則理之所不可以已也陛下若引臣冤免臣兄之罪收往失發惻愴之詔懷可報之意則桀之犬實可吠堯跖之客實可刺由又何況由之犬堯之客臣非公生實爲陛下重此名於天下已成之基可惜之寶莫復是加寔明寔昌不可不循寔微寔滅不可不慎惟陛下熟察詳擇其衷若陛下猶以爲疑鎮軍未之允決乞下征東共詳可否無以向隅之悲而傷陛下滿堂之樂何則陛下昏王之弟江夏亦昏王之弟鎮軍受遺託之恩先臣亦荷顧命之重情節無

異所為皆同殊者唯以成敗仰資聖朝耳臣不勝愚忠請使羣臣
廷辯者臣乞專令一人精賜本語僥幸萬一南齊書崔慧景傳懷又上疏謂報可尋下獄死天聽昭然則軻沈七
族離燔妻子人以爲難臣豈不易

崔祖思

祖思字敬元慧景宗人漢末中尉珍七世孫仕宋爲州主簿歷
武帝轉國主簿除奉朝請安成王撫軍參軍員外正員郎轉相
國從事中郎遷齊國內史及受禪轉長兼給事黃門侍郎遷監
朔將軍冠軍司馬領郡太守遷冠軍將軍進號征虜將軍假節
青冀二州刺史有集二十卷

國名啟

識書云金刀利刃齊刈之今宜稱齊實應天命南齊書崔祖思傳宋報初議封太祖
爲梁公祖思啟從之
陳政事啟

禮詰者人倫之襟冕帝王之樞柄自古開物成務必以敦學爲先世不習學民忘志義倖競因斯而興禍亂是焉而作故篤俗昌治莫先道教不得以夷禍革慮儉泰移業今無員之官空受祿力三載無考績之效九年闕登黜之序國儲以之虛匱民力爲之凋散能否無章經渭混流宜太廟之南弘脩文序司農以北廣開武校臺州列國限外之職問其所樂依方課習各盡其能明供僮幹如先充給若有廢墜遣還故郡殊經奇藝待以不次士脩其業必有異等民識其利能無勉勵

漢文集上書囊以爲殿帷身衣七絺以韋帶劍慎夫人衣不曳地

惜中民十家之產不爲露臺劉備取帳鉤南史作構銅鑄錢以充國用

魏武遣女阜帳婢十人東阿婦以繡衣賜死王景興以浙米見誚

宋武節儉過人張妃房帷南史作帷碧綃蚊幃三齊枯席五盞盤桃花

米飯殷仲文勸令畜伎答云我不解聲仲文曰但畜自解又答畏

解故不畜。歷觀帝王未嘗不以約素興。侈麗亡也。伏惟陛下體唐成儉。踵虞爲樸。寢殿則素木卑構。儲器則陶瓢充御。瓊簪玉箸。碎以爲塵。珍裘繡服。焚之如草。斯實風高上代。民偃下世矣。然教信雖孚。氓染未革。宜加甄明。以速歸厚。詳察朝士。有柴車蓬館。高以殊等。雕牆華輪。卑其稱謂。馳禽荒色。長違清編。嗜音酣酒。守官不徙。物識義方。且懼且勸。則調風變俗。不俟終日。

憲律之重。由來尙矣。故曹參去齊。唯以獄市爲寄。餘無所言。路溫舒言。秦有十失。其一尙在治獄之更是也。實宜清置廷尉。茂簡三官。寺丞獄主。彌重其選。研習律令。刪除繁苛。詔獄及兩縣。一月三訊。觀貌察情。欺枉必達。使明慎用刑。無忝大易。盡失不經。靡愧周書。漢來治律有家。子孫竝世其業。聚徒講授。至數百人。故張子二氏。絜譽文宣之世。陳郭兩族。流稱武明之朝。決獄無冤。慶昌枝裔。槐衮相襲。蟬紫傳輝。今廷尉律生。乃令史門戶。族非咸弘。庭缺于

訓刑之不措抑此之由如詳擇篤厚之士使習律令試簡有微擢爲廷尉僚屬苟官世其家而不美其績鮮矣廢其職而欲善其事未之有也若劉累傳守其業庖人不乏龍肝之饌斷可知矣

樂者動天地感鬼神正情性立人倫其義大矣按前漢編戶千萬太樂伶官方八百二十九人孔光等奏罷不合經法者四百四十一人正樂定員惟置三百八十八人今戶口不能百萬而大樂雅鄭元徽時校試千有餘人後堂雜伎不在其數糜廢力役傷敗風俗今欲撥邪歸道莫若罷雜伎王庭唯置鍾簫羽戚登歌而已如此則官充給養國反淳風矣

論儒者以德化爲本談法者以刑削爲體道教治世之梁肉刑憲亂世之藥石故以教化比雨露名法方風霜是以有恥且格敬讓之樞紐令行禁止爲國之關鍵然則天下治者賞罰而已矣賞不事豐所病於不均罰不在重所困於不當如今甲勲少乙功多賞

甲而捨乙天下必有不勸矣丙罪重丁責輕罰丁而赦丙天下必有不悛矣是賞罰空行無當乎勸沮將令見罰者寵習之臣受賞者仇讎之士戮一人而萬國懼賞匹夫而四海悅

籍稅以厚國國虛民貧廣田以實廩國富民贍堯資用天之儲實極懷山之數湯憑分地之積以勝流金之運近代魏置典農而中都足食晉開汝潁而汴河委儲今將掃闢咸華題鏤龍漠宜簡役敦農開田廣稼時罷山池之威禁深抑豪右之兼擅則兵民優贍可以出師

古者左史記言右史記事故君舉必書盡直筆而不污上無妄動知如絲之成綸今者著作之官起居而已述事之徒褒諛爲體世無董狐書法必隱時闕南史直筆未聞又廢諫官聽納靡依雖課勵朝僚徵訪芻輿莫若推舉質直職思其憂夫越任干事在言爲難當官而行處辭或易物議旣以無言望己已亦當以吞默慙人

中丞雖謝威立未有全廢劾簡廷尉誠非釋之。蓋容都無訊牒故知與其謬人。寧不廢職。目前之明效也。漢徵賈禹為諫大夫。矢言先策。賈侯勝狂直拘繫。出補諷職。伐柯非遐行之卽善。

天地無心。賦氣自均。寧得誕秀往古而獨寂寥一代。將在知與不知用與不用耳。夫有賢而不知。知賢而不用。用賢而不委。委賢而不信。此四者。古今之通患也。今誠重郭隗而招劇辛。任鮑叔以求夷吾。則天下之士不待召而自至矣。南齊書崔祖思傳

崔元祖

元祖祖思從弟。爲射聲校尉。歷驍騎將軍。出爲東海太守。

請畱將少游啟

少游臣之外甥。特有公輸之思。宋世陷虜。處以大匠之官。今爲副使。必欲模範宮闕。豈可合瓊鄉之韻。取象天官。臣謂且畱少游。令使主反命。南齊書魏虜傳。永明九年。

十彬

彬字士蔚，濟陰宛句人。晉中領軍嗣之孫。仕宋爲西曹主簿，奉朝請員外郎，齊臺建除右軍參軍，出爲南康郡丞，除南海王國郎中，令尙書比部郎，安吉令，車騎記室。永元中，爲平越長史，綏建太守。

蝦蟆賦

紆青拖紫，名爲蛤魚。

南齊書下彬傳世謂比令僕也。又見南史十二御覽九百四十九。

科斗唯唯，羣浮闇水。維朝繼夕，聿役如鬼。

同上比令史諸事也。

蚤蝨賦

序

余居貧，布衣十年，不製一袍之緼，有生所託，資其寒暑，無與易之。爲人多病，起居甚疏，榮寢敗絮，不能自釋，兼攝性懈惰，懶事皮膚，澡刷不謹，滌沐失時，四體齷齪，加以臭穢，故輦席蓬纓之間，蚤蝨猥流，淫癢滑澁，無時忽肉，探揣撻撮，日不替手。蝨有諺言，朝生暮

孫若吾之蝨者無湯沐之慮絕相弔之憂晏聚乎久袴爛布之裳服無改換指齧不能加脫略緩嬾復不勤於捕討孫孫息息三十

五歲焉

南齊書卞彬傳又見南史七十一御覽八百十九九百五十一

禽獸決錄目

羊性淫而狠豬性卑而率鵝性頑而傲狗性險而出

南齊書卞彬傳南史卞彬

傳御覽八百八十九

賜進士出身二品銜廣東等處提刑按察使司按察使兼管驛傳事務黃岡王毓藻校刊

全齊文卷二十一終

全齊文卷二十二

烏程嚴可均校輯

願歎

歎字景怡一字玄平吳郡鹽官人宋末徵爲揚州主簿永明初爲太學博士竝不就有集三十卷

獻治綱表

臣聞舉綱提綱振裘持領綱領既理毛目自張然則道德綱也物勢目也上理其綱則萬機時序下張其目則庶官不曠是以湯武得勢師道則祚延秦項忽道任勢則身戮夫天門開闔自古有之四氣相新絺裘代進今火澤易位三靈改憲天樹明德對時育物授揚仄陋野無伏言是以窮谷愚夫敢露偏管謹刪撰老氏獻治綱一卷伏願稽古百王斟酌時用不以芻蕘棄言不以人微廢道則率土之賜也微臣之幸也幸賜一疏則上下交泰雖不求民而

民悅不祈天而天應。應天悅民。則皇基固矣。臣志盡幽深。無與榮
勢。自足雲霞。不須祿養。陛下既遠見尋求。敢不盡言。言既盡矣。請
從此退。南齊書
顧歡傳

夷夏論

夫辯是與非。宜據聖典。尋二教之源。故兩標經句。道經云。老子入
關之天竺維衛國。國王夫人名曰淨妙。老子因其晝寢。乘日精入
淨妙口中。後年四月八日夜半時。剖右腋而生。墮地卽行七步。舉
手指天曰。天上天下。唯我爲尊。三界皆苦。何可樂者。於是佛道興
焉。此出玄妙內篇。佛經云。釋迦成佛有塵劫之數。出法華無量壽
或爲國師。道士儒林之宗。出瑞應本起歡論之曰。五帝三皇。不聞
有佛。國師道士。無過老莊。儒林之宗。孰出周孔。若孔老非聖。誰則
當之。然二經所說。如合符契。道則佛也。佛則道也。其聖則符。其跡
則反。或和光以明近。或曜靈以示遠。道濟天下。故無方而不入。智

周萬物。故無物而不爲。其人不同。其爲必異。各成其性。不易其事。是以端委搢紳。諸華之容。翦髮緇衣。羣夷之服。擊跽磬折。俟甸之恭。狐蹲狗踞。荒流之肅。棺殯槨葬。中夏之制。火焚水沈。西戎之俗。全形守禮。繼善之教。毀貌易性。絕惡之學。豈伊同人。爰及異物。鳥王獸長。往往是佛。無窮世界。聖人代興。或昭五典。或布三乘。在鳥而鳥鳴。在獸而獸吼。教華而華言。化夷而夷語耳。雖舟車均於至遠。而有川陸之節。佛道齊乎達化。而有夷夏之別。若謂其致既均。其法可換者。而車可涉川。舟可行陸乎。今以中夏之性。效西戎之法。旣不全同。又不全異。下棄妻孥。上廢宗祀。嗜欲之物。皆以禮伸。孝敬之典。獨以法屈。悖德犯順。冒莫之覺。弱喪忘歸。孰識其舊。且理之可貴者。道也。事之可賤者。俗也。舍華效夷。義將安取。若以道邪。道固符合矣。若以俗邪。俗則大乖矣。屢見刻鵠沙門。守株道士。交諍大小。互相彈射。或域道以爲兩。或混俗以爲一。是牽異以爲

同破同以爲異則乖爭之由淆亂之本也尋聖道雖同而法有左右始乎無端終乎無末泥洹仙化各是一術佛號正真道稱正一歸無死真會無生在名則反在實則合但無生之教賒無死之化切切法可以進謙賒賒法可以退夸強佛教文而博道教質而精精非麤人所信博非精人所能佛言華而引道言實而抑抑則明者獨進引則昧者競前佛經繁而顯道經簡而幽幽則妙門難見顯則正路易遵此二法之辨也聖匠無心方圓有體器既殊用教亦異施佛是破惡之方道是興善之術興善則自然爲高破惡則勇猛爲貴佛跡光大宜以化物道跡密微利用爲己優劣之分大略在茲夫蹲夷之儀婁羅之辯各出彼俗自相聆解猶蟲瞿鳥聒何足述效

南齊書顧歡傳南史顧歡傳弘明集七

荅袁粲駁夷夏論

案道經之作著自西周佛經之來始乎東漢年踰八百代懸數十

若謂黃老雖久而濫在釋前是呂尚盜陳恆之齊劉季竊王莽之
僕也經云戎氣強獷乃復略人頰車邪又夷俗長跽法與華異翹
左跂右全是蹲踞故周公禁之於前仲尼戒之於後又舟以濟川
車以征陸佛起於戎豈非戎俗素惡邪道出於華豈非華風本善
邪今華風既變惡同戎狄佛來破之良有以矣佛道實貴故戒業
可遵戎俗實賤故言貌可棄今諸華士女氏族弗革而露首偏跽
濫用夷禮云於翦落之徒全是胡人國有舊風法不可變又若觀
風流教其道必異佛非東華之道道非西戎之法魚鳥異淵永不
相關安得老釋二教交行八表今佛既東流道亦西邁故知世有
精麤教有文質然則道教執本以領末佛教救末以存本請問所
異歸在何許若以翦落爲異則胥靡翦落矣若以立像爲異則俗
巫立像矣此非所歸歸在常住當住之象常道執異神仙有死權
便之說神仙是大化之總稱非窮妙之至名至名無名其有名者

二十七品仙變成眞眞變成神或謂之聖各有九品品極則入空寂無爲無名若服食茹芝延壽萬億壽盡則死藥極則枯此修考之士非神仙之流也

南史顧微傳

題東府柱

三十年二月二十一日

南史顧微傳元嘉中出爲寄住東府忽題柱云云因東歸後元凶弑逆是其年月日也

宗測

測字敬微一字茂深南陽人宋徵士炳孫州舉秀才主簿豫章王再辟參軍永明中徵太子舍人建武中徵司徒主簿並不就

荅府召

何爲謬傷海鳥橫斤山水

南齊書宗測傳微章王時微爲參軍測荅

又荅

性同鱗羽愛止山壑春戀松筠輕迷人路縱宕巖流有若狂者忽

不知老至而今鬢已白。豈容課虛責有限。魚慕鳥哉。南齊書宗測傳豫章王曄

復遣書請之尉為參軍測答

荅魚復侯子響
少有狂疾。尋山采藥。遠來至此。量腹而進。松朮度形。而衣薜蘿。淡然已足。豈容當此橫施。南齊書宗測傳子響為江州厚遣贈遺測曰云云

陳文建

文建宋末為將作匠太史令入齊未詳。按天文志作文孝建陳天文南史作文建陳天

符瑞今從高紀

奏符命

六亢位也。後漢自建武至建安二十五年。一百九十六年而禪魏。魏自黃初至咸熙二年。四十六年而禪晉。晉自太始至元熙二年。一百五十六年而禪宋。宋自永初元年至昇明三年。凡六十年。咸以六終六受。六亢位也。驗往揆今。若斯昭著。敢以職任。備陳管穴。

伏願順天時應符瑞

南齊書高帝紀上太史將作匠陳文建奏符命又見南史四

奏陳天文

自孝建元年至昇明三年日蝕有十虧上有七占曰有亡國失君之象一曰國命絕主危亡孝建元年至昇明三年太白經天五占曰天下革民更王異姓興孝建元年至昇明三年月犯房心四太自犯房心五占曰其國有喪宋當之孝建元年至永光元年奔星出入紫宮有四占曰國去其君有空國徙王大明二年至元徽四年天再裂占曰陽不足白虹貫日人君惡之孝建二年至大明五年月入太微太豫元年至昇明三年月又入太微孝建元年至元徽二年太白入太微各八熒惑入太微六占曰七曜行不軌道危亡之象貴人失權勢主亦衰富有王入爲主孝建二年至昇明二年太白熒惑經羽林各三占曰國殘更世孝建二年四月十三日熒惑守南斗成勾已占曰天下易正更元孝建三年十二月一日

填星熒惑辰星合於南斗。占曰：改立王公。大明二年十二月二十六日，太白犯填星於斗。六年十一月十五日，太白填星合於危。占曰：天子失土。景和元年十月八日，熒惑守太微成勾己。占曰：王者惡之。主命無期。有從主。若主王天下更紀。泰始三年正月十七日，白氣見西南，東西半天，名曰長庚。六年九月二十七日，白氣又見東南，長二丈，竝形狀長大，猛過彗星。占曰：除舊布新，易王之象。遠期一紀。至昇明三年一紀訖。泰始四年四月二十四日，太白犯填星於胃。占曰：主命惡之。泰始七年六月十七日，太白歲星填星合於東井。占曰：改立王公。元徽四年至昇明二年三月，日有頻食。占曰：社稷將亡。王者惡之。元徽四年十月十日，填星守太微宮。遵從行。歷四年。占曰：有亡君之戒。易世立王。元徽五年七月一日，熒惑太白辰星合於翼。占曰：改立王公。昇明二年六月二十日，歲星守斗，建陰陽終始之門。大赦昇平之所，起律曆七政之本。源德星守

之天下更年五禮更興多暴貴者昇明二年十月一日熒惑守輿
鬼三年正月七日熒惑守兩戒間成勾己占曰尊者失朝必有亡
國去王昇明三年正月十八日辰星孟效西方占曰天下更王昇
明三年四月歲星在虛危徘徊玄枵之野則齊國有福厚爲受慶
之符

南齊書天文志上宋昇明三年太史令將作匠文孝建陳天文奏

任遐

遐字景遠樂安博昌人仕宋入齊爲尚書左丞永明中爲御史
中丞建武末爲光祿大夫

奏劾劉祥

祥少而狡異長不悅徙請謁絕於私館反唇彰於公庭輕議乘輿
歷貶朝望肆醜無避縱言自若厥兄浮櫬天倫無一日之悲南金
弗獲嫂姪致其輕絕孤舟負反存歿相捐遂令暴客掠奪骸柩行
路流歎有識傷心攝祥門生孫狼兒列祥頃來飲酒無度言語闢

逸道說朝廷亦有不遜之語不避左右非可稱紙墨兄整先為廣
州於職喪亡去年啟求迎喪還至大雷聞祥與整妻孟爭計財物
瞋忿祥仍委前還後未至鵲頭其夜遭劫內人竝為囚人所淫略
如所列與風聞符同請免官付廷尉

南齊書劉祥傳有以祥連珠
啟上者上令御史中丞任還

奏

張欣泰

欣泰字義亨竟陵竟陵人宋左衛將軍興世子辟州主簿歷諸
王府佐入齊歷官監朔將軍除尚書都官郎武帝卽位以為直
閣將軍歷豫章王太尉參軍安遠護軍武陵內史復為直閣步
兵校尉除正員郎徙隨王子隆鎮西中兵改領河東內史免明
帝卽位為領軍長史遷諮議參軍出為永陽太守東昏侯卽位
除輔國將軍廬陵王安東司馬進雍州刺史以謀廢立伏誅
移魏廣陵侯

聞攻鍾離是子之深策可無謬哉兵法云城有所不攻地有所不爭豈不聞之乎我國家舟舸百萬覆江橫海所以案甲於今不至欲以邊城疲魏士卒我且千里運糧行畱俱弊一時霖雨川谷涌溢然後乘帆渡海百萬齊進子復奚以御之乃令魏主以萬乘之重攻此小城是何謂歟攻而不拔誰之恥邪假令能拔子守之我將連舟千里舳艫相屬西過壽陽東接滄海仗不再請糧不更取士卒偃臥起而接戰乃魚鱉不通飛鳥斷絕偏師淮左其不能守較可知矣如其不拔吾將假法於魏之有司以請子之過若挫兵夷眾攻不卒下驅士填隍拔而不能守則魏朝名士其當別有深致乎吾所未能量昔魏之大武佛狸領一國之眾攻十雉之城死亡太半僅以身返既智屈於金墪亦雖拔而不守皆算失所爲至今爲笑前監未遠已忘之乎和門邑邑戲載往意

南齊書張欣泰傳

司馬憲

憲仕宋入齊爲殿中郎

郊殷議

南郊無配饗祠如舊無明堂無配宜應廢祀其殷祠同用今年十

月

南齊書禮志上建元元年七月

熊襄

襄豫章人

齊典序

尚書堯典謂之虞書則附所述故通謂之齊名爲河洛金匱

南齊書

超傳時豫章熊襄著齊典上起十代其序云云又見南史檀超傳

孔覲

覲會稽人建元中爲奉朝請

上鑄錢均貨議

建元四年

食貨相通理勢自然李悝曰糴甚貴傷民甚賤傷農民傷則離散

農傷則國貧甚賤與甚貴其傷一也三吳國之關閭比歲被水潦而糴不貴是天下錢少非穀穰賤此不可不察也鑄錢之弊在輕重屢變重錢患難用而難用爲累輕錢弊盜鑄而盜鑄爲禍深民所盜鑄嚴法不禁者由上鑄錢惜銅愛工也惜銅愛工也者謂錢無用之器以通交易務欲令輕而數多使省工而易成不詳慮其爲患也自漢鑄五銖錢至宋文帝歷五百餘年制度世有廢興而不變五銖者其輕重可法得貨之宜也以爲宜開置錢府方收貢金大興鑄鑄錢重五銖一依漢法府庫以實國用有儲乃量奉祿薄賦稅則家給民足頃盜鑄新錢者皆效作剪鑿不鑄大錢也唐澤滌染始皆類故交易之後淪變還新良民弗售滌染不復行矣所賣鬻者皆徒失其物盜鑄者復賤買新錢滌染更用反復生詐循環起姦明主尤所宜禁而不可長也若官錢已布於民使嚴斷剪鑿小輕破缺無周郭者悉不得行官錢細小者稱合銖兩銷

以爲大利貧良之民塞姦巧之路錢貨既均遠近若一百姓樂業
市道無爭衣食滋殖矣南齊書劉懷傳建元四年奉朝請孔覲上錢貨均貨議又見通典九

蔡履

履永明初爲祠部郎中

南郊明堂異日議

郊與明堂本宜異日漢東宮禮儀志南郊禮異次北郊明堂高廟
世祖廟謂之五供蔡邕所據亦然近世存省故郊堂共日來牟郊
祭宜有定準南齊書禮志

賜進士出身二品銜廣東等處提刑按察使司按察使兼管驛傳事務闕王毓藻校刊

全齊文卷二十二終

全齊文卷二十三

烏程嚴可均校輯

謝朓

朓字玄暉，陳郡陽夏人。永明初，爲豫章王太尉參軍，遷隨王東中郎府屬。轉王儉衛軍東閣祭酒、太子舍人。隨王鎮西功曹，轉文學。遷新安王中軍記室，尋兼尚書殿中郎，明帝輔政，以爲驃騎諮議領記室。及卽位，轉中書郎，出爲宣城太守。又爲晉安王鎮北諮議，南東海太守，行南徐州事。遷尚書吏部郎。永元中，爲始安王遙光所誅，有集十二卷，逸集一卷。

擬風賦奉司徒教作

起日域而搖落，集桂宮而送清。開翠帳之影謫，響行珮之輕鳴。揚淮南之妙舞，發齊后之妍聲。下鴻池而蓮散，上雀臺而雲生。至於新虹明歲，高月照秋。睟儀乃豫，冲想雲浮。鄒馬之賓咸至，申穆之

醴已酬朝役登樓之詠夕引小山之謳厭朱邱之沈寢思輕舉而
遠遊騶驕之馬魚躍飄鑒車而水流此乃大王之盛風也若夫子
雲寂寞叔夜高張煙霞潤色荃蕙結芳出礪幽而泉冽入山丘而
松涼眇神玉於丘壑獨起遠於孤觴斯則幽人之風也

本集又略見藝文類

七夕賦奉護軍命作

金祗司矩火曜方流素鐘登御夷律鳴秋朱光既斂涼雲始浮
夕露之謠謠升夜月之悠悠步廣庭而延眺屬天媛之淹留嗟斯
靈之淑景招好仇於服箱邁姮娥而擢質淩瑤華而擅芳靚白玉
而爲飾罪丹霞而爲裳迴龍駕之容裔亂鳳管之淒鏘騰燭光於
西極命二妃於瀟湘軾帝車而捐玦凌天津而上翔悵漢渚之夕
漲忻河廣之既梁臨瑤席而宴語絲含睇而蛾揚嗟闌夜之難永
泣會促而怨長忌纖阿之方催吝長庚之末光撫鳴琴而修悅浩

安歌而自傷。歌曰。月殿清兮桂觴酬。雲幄靜兮香風浮。龍蹠蹠兮
玉鑾整。曙星河兮不可畱。分雙袂之一斷。何四氣之可周。斯乃嚮
像恍惚。彷彿幽曖。耳之無聞。目之無纖。故鐘鼓聞而延子隱。白日
沈而季後對。豈形氣之所求。亦理將其如味。君王壯思風飛。冲情
雲上。顧楚詩而縱轡。瞻蘭書而競爽。實研精之多暇。聊餘日之馳
蕩。賦幽靈以去惑。排視聽而玄往。晒陽雲於荆夢。賦洛篇於陳想。
乃澄心而閑邪。庶綢繆於茲賞。

本集又見藝文類聚四初學記四

臨楚江賦

爰自山南。蒲暮江潭。滔滔積水。裊裊霜嵐。憂與憂兮竟無際。客之
行兮歲已嚴。爾乃雲沈西岫。風動中川。馳波鬱素。駭浪浮天。明沙
宿莽。石路相懸。於是霧隱行雁。霜眇虛林。迢迢落景。萬里生陰。列
攢筍兮極浦。弭蘭鵠兮江津。奉王鱗之未暮。洽勝賞之芳音。願希
光兮秋月。承永照於遺簪。

本集又見初學記四

思歸賦 并序

夫鑑之積也無厚而納窮神之照心之徑也有域而懷重淵之深余少而薄游身身防方思俄然萬里晚而自省諒非一塗

余菲薄以固陋受靈恩而不訾拖銀黃之沃若剖金符之陸離舟未濟而河廣途方遙而馬疲忽中寢而念厲魂中旦而九移昔受教於君子逢知己之隆盼被名立之羽儀沾宦成之藻綯羌服義而不怠豈臨岐而喻變勢方迅於轉圓理好旋於奔電援弱葛而能升踐重岡而不眩信視福之非已寧悔禍其如見大明廟以高臨吹萬忻而同悅跨神泉之沃衍奉英藩之睿哲承比屋之隆化踵芳塵之餘烈懷蠲蠲之褊心無今毗之誕節竟伊鬱而不怡賴遐計於先哲紛吾生之遊薄彌一紀而歷茲自下車於江海涉青春於是時瞻崇岡而引領望大廈而長思離曲街之委隘猶寤寐而見之泥神交而通夢眇河漢於佳期爾乃眷言興慕南眺悠然

方整歸轡願受一廬考華城之直陌相洛浦之迴阡連飛夢於故
友接閒館以懷僊臨南場以藝菰寄北地而采蓮睇微英之霏霏
望水葉之田田乃翦山木不日爲功非輪非奩去斲去磨夜索綯
而繞繞旦乘屋而芄芄竹橋崎嶇而經北繩閑窈窕以臨東布茵
蕭於疏櫺織葵亂於迴櫺於是籬插芳槿門拂長楊簷桃春發窗
竹夏涼晨露晞而草馥微風起而樹香無芳菲以襲予空旃旋於
都房恆離居以歲月痛銷落而徒傷我聞時命有殖無遷徵事或
在求理未甄譬豐草之區別隨霜露而大延背萱鮮於堂北尙幽
幽而未捐苟外物以能感亦在應而無驚況朝霞之采可嚙瓊犀
之飾方宣養以虛白之氣悟以無生之篇豈加璧之贈可執執珪
之位能繼歸來薄暮聊以永年

本集又略見蘇
文類聚二十七

酬德賦

并序

右衛沈侯以冠世偉才眷予以國士以建武二年予將南牧見

贈五舅。子時病既以不堪蒞職。又不獲復諒。四年。子忝役朱方。又致一首。迫東偏寇亂。良無暇日。其夏還京師。且事譙言。未遑篇章之思。沈侯之麗藻天逸。固難以報章。且欲申之賦頌。得盡其體物之旨。詩不云乎。無言不酬。無德不報。言既未敢爲酬。然所報者寡於德耳。故稱之曰酬德賦。其辭曰。

悲夫四時游之代序。六龍騖而不息。輕蓋靡於駿奔。玉衡勞於掛翼。嗟歲晏之彫歎。曾陰默以悽惻。玄武伏於重介。宛虹潛以自匿。覽斯物之用舍。相羣芳之動植。弔悴軀於華省。理衣簪而自敕。思披文而信道。散念漣於胸臆。嗟民生之知用。知莫深於知己。彼知己之爲深。信懷之其何已。牽弱葛之蔓延。寄陵風於松杞。指曲蓬之直達。固有憑於原泉。彼排虛與聽實。又相鳴於林止。興伐木於友生。詠承筐於君子。矧景行之在斯。方寄言於同恥。求相仁於積習。寓神心於名理。惟敦牂之旅歲。寶興齊之二六。泰武運之方昌。

觀休風之未淑。龍樓儼而洞開。梁邱煥其重。君奉筆於帝儲。我
曳裾於皇穆。藉風雲之化景。申遊好於蘭菊。結德音而爲佩。帶芳
猷而爲服。援雅範以自綏。懿前脩之所勛。昔仲宣之發穎。實中郎
之倒屣。及士衡之籍甚。托壯武之高義。有杞梓之貞心。協丹采之
輝被。伊吾人之陋薄。雖黼藻之何宣。惟風雅之未變。知雲網之不
厭。璧屑棟之將傾。必華榷之先落。翳明離以上賓。屬傳體於纖葛。
周二輝而分崩。擠九鼎於重壑。雖魚鳥之欲安。駭風川而迴薄。微
天道之布新。嗟員首其焉託。子寤迹以多悔。塊離尤而獨處。君紆
組於名邦。貽話言於川渚。悵分手於東津。望徂舟而延伫。慮古今
之爲隔。豈山川之云阻。賴先德之龍興。奉英靈之電舉。事紫泥之
密勿。腰青綬而容與。沾後惠以揚來。竟卒獲其笑語。我騰舟以命
徒。將泊徂於南夏。旣勸予以炯戒。又引之以風雅。若笙簧之在聽。
雖舒憂而可假。昔疢病於漳濱。思繼歌而莫寫。恩靈降之未已。奉

京枌而作傅。臨邦途之永陌。懷子馬於騏驥。望平津而出宿。登崇岡而興賦。願歸轡之南迴。引行鑣而東驅。何瓌才之博侈。申贈辭於萱樹。指代匠而切偲。比治素而引喻。方含毫而報章。迫紛埃之東鶩。釋末位以言歸。忽乘驛以南赴。連篇章之莫訓。欲舒言於往句。類鍛副之難矯。似洞源之不注。意搔搔以杼柚。魂營營而馳鶩。爾腰戟於戎禁。我拂劍於郎闥。願同車以日夜。城望昏而掩扉。時遊盤以未極。睠落景之徂輝。若清顏之倏忽。愜歡賞之多違。排重關而休告。知南館之有依。驂職門以右轉。僕望路其如歸。忘清漏之不緩。惜曉露之方晞。聞夫君之東守。地隱蒼而懷僊。登金華以問道。得石室之名篇。悟寰中之迫脅。欲輕舉而舍旃。離寵辱於毀譽。去天伐於腥膻。忽攜手以上征。躋中皇之修迴。巾帝車之廣軾。棹河舟之輕艦。歷星術之熠燿。浮天潢之嬰溟。機九轉於玉漿。練七明於神鼎。吹萬化而不喧。度千春之可並。齊天地於倏忽。安事

人間之紆綈哉

本集又略見藝文類聚三十三

遊後園賦

積芳兮遶水，幽蘭兮翠竹。上蕪蕪兮蔭景，下田田兮被谷。左慈曉兮彌望，右芝原兮寫目。山霞起而削成，水積明以經復。於是敝風圃之藹藹，聳雲館之迢迢。周步檐以升降，對玉堂之沈寥。追夏德之方暮，望秋清之始颺。藉宴私而遊衍，時寤語而逍遙。爾乃日棲榆柳，霞照夕陽。孤蟬已散，去鳥成行。惠氣湛兮帷殿肅，清陰起兮池館涼。陳象設兮以玉墀，紛蘭籍兮咀桂漿。仰微塵兮美無度，奉英軌兮式如璋。藉高文兮清談，豫含毫兮握芳。則觀海兮爲富，乃游聖兮知方。

本集又略見藝文類聚六十五

高松賦奉竟陵王教作

閱品物於幽記，訪叢育於祕經。巡汜林之彌望，識斯松之最靈。提於巖以羣茂，臨於水而宗生。豈榆柳之比性，指冥椿而等齡。若夫

修幹垂蔭喬柯飛穎望肅肅而既閒卽微微而方靜懷風陰而送
聲當月露而畱影旣芊眠於廣隰亦迢遞於孤嶺集九僊之羽儀
棲五鳳之光景固總木之爲選貫山川而自永爾乃青春爰謝雲
物含明江皋綠草曖然已平紛弱葉而凝照競新藻而抽英陵翠
山其如前施懸羅而共輕至於星迴窮紀沙雁相飛同雲決其無
色陽光沈而減暉卷風颺之歛吸積霰雪之嚴霏豈彫貞於歲暮
不受令於霜威若乃體同器制質兼上木夏書稱其岱賦周篇咏
其徂徠乃屈己以弘用構大壯於雲臺幸爲玩於君子畱神心而
顧懷君王乃徙譙蘭室解佩明椒奉幽蘭於夕陰詠簪幹於琴朝
陵高丘以致思御風景而逍遙夷黜冕之隆貴懷汾陽之寂寥邈
道勝於千禩蘊神理而自超夫江海之爲大實涓澮之所歸瞻衡
恒之峻極不讓壤於塵微嗟孤陋之無取幸聞道於清微理弱羽
於九萬愧不能兮奮飛

本集又見藝文類聚八
十八初學記二十八

杜若賦奉隋王教於坐獻

馮瑤圃而宣游。臨水木而延仁。柳含色於遠岸。泉鏡流於枉渚。蔭綠竹以淹留。藉幽蘭而容與。覽茲榮之悅茂。紛爲芳於清縹。觀夫結根擢色。發曜垂英。緣春繡以纖布。蔭涼潭而影清。景奕奕以四照。枝靡靡而葉傾。冒霜蹊以獨構。當春郊而逕平。牽汀洲以企予。懷石泉於幽情。嗟中巖之纖草。廁金芝於芳叢。夕舒榮於溽露。旦發彩於春風。承羲陽之光景。庶無悲於轉蓬。本集又見藝文類聚八十八

野鴛賦 并序

有門人斃一野鴛。因以爲獻。予時命以登俎。用待賓客。客有愛其羽毛。請予爲賦。其詞曰。

夫何羅人之伎巧。薦江海之逸禽。落摩天之迅羽。絕歸飛之好音。碎文錦之丹臆。裂雕綺之翠襟。孤雛驚以靡翼。鰥雌叫而莫尋。越滄流以遠致。乃交畱以兼金。因閹寺以傳請。排遂戶以重深。貴數

三才圖會卷之二十三
祗召取愛願登俎以甘心

本集又略見藝文類聚九十一

爲錄公拜揚州恩教

昔召南分陝流甘棠之德平陽好道深獄市之寄吾忝屬負荷任
總侯伯受餞元戎作牧中甸此地五都雜會四方是則而向隅之
矜斯積納陸之歎猶繁興念下車無忘待旦有齊禮導德致之仁
壽弘漏網之寬申在宥之澤

魏文類聚五十一

臨東海餉諸葛璩穀教

昔長孫東組降龍丘之節文舉北轍高通德之稱所以激貪立懦
式揚風範處士諸葛璩高風所漸結轍前修豈懷珠被褐韜玉待
價將幽貞獨往不事王侯者邪聞事親有啜菽之養就養寡藜蒸
之給豈得獨享萬鍾而忘茲五秉可餉穀百斛

梁書諸葛璩傳謝朓爲東郡太守教

爲宣城公拜章

惟天爲大日星度其象謂地蓋厚河岳宣其氣斯冕旒所以貞觀

衰職所以代終。慙下穆而上尊。豈南征而北怨。何以克詠九歌。載宣七德。銘彼旗常。勒斯鍾鼎。

藝文類聚五十一

爲明帝拜錄尚書表

升降玉階。對揚休命。六轡在手。千里何偕。司會天官之統。尚書百僚之本。弘之卽庶績惟凝。替之則彝倫斯斁。修身踐言。本慙五美。果行育德。未階六正。妄屬負圖之寄。多謝五仁之績。操檄擬於龍津。荷梓梁於雲構。無以輔佐明堂。遺象麟閣。

藝文類聚四十八

爲齊明帝讓封宣城公表

如其懸旌霸漭。刷馬伊穀。灑酒望屬車之塵。整笏侍升平之禮。陛下許謨玄覽。欽若宏圖。覽臣匪躬。共申彝訓。雖量能之請。近遂微躬。則弘長之風。足軌來世。

藝文類聚五十一

爲百官勸進齊明帝表

臣聞時乘在御。必待先天之業。神化爲皇。乃叶應期之運。況復湯

孫有緒纂堯惟德舊邦仁新復禹歸祚大齊之權輿寶厯孕育前
古昭假四海克酬三靈而嗣命疾威蕃鄙叛渙委裘御寓茲鼎如
忽陛下文思體道徇齊作聖廟應龍於冀州戮長蛇於沮水榮光
之瑞昭迴延喜之寶潤色天睠爰發人謀咸贊伏願陛下仰答靈
祇弘宣景命誕受多方奄宅萬國

藝文類
聚十四

拜中軍記室辭隨王牋

故吏文學謝朓死罪死罪卽日被尚書召以朓補中軍新安王記
室參軍朓聞潢汗之水願朝宗而每竭驚蹇之乘希沃若而中疲
何則泉壤搖落對之惆悵岐路西東或以欵呬況遇服義徒擁歸
志莫從邈若墜雨翻似秋蒂朓竇庸流行能無算屬天地休明山
川受納竊采一介拙揚小善故捨耒場圖奉筆兔園東亂三江西
浮七澤契闊戎旌從容讌語長裾日曳後乘載脂榮立府庭恩加
顏色沐髮晞陽未測涯涘撫臆論報早誓肌骨不悟淪悞未運波

臣自蕩渤澥方春旅嗣先謝清切藩房寂寥舊館輕舟及溯弔影
獨留白雲在天龍門不見去德滋永思德滋深唯待青江可望俟
歸艤於春渚朱郎方聞效蓬心於秋實如其簪履或存在席無改
雖復身填溝壑猶望妻子知歸攬涕告辭悲來橫集不任大馬之
誠

文選

南齊書謝朓傳南史十九

爲王敬則謝會稽太守啟

臣本布衣不謀遠大折衝之勤不舉變理之義何階常恐覆餗是
貽咎徵斯應陛下繼祿勝統日月重光得以桓珪袞服拜奉歲時
視濯獻牲鞠躬郊廟而鴻恩妄假復授龜符玉節適於雙璜表東
侔於四履臨邊三事既謝張溫潁川再撫亦慙黃霸

魏文類聚六

謝隨王賜左傳啟

昭晰殺青近發中汗恩勸挾冊慈勛下帷朏未覩山笥早惜河籍
業謝專門說非章句庶得既困而學括羽瑩其蒙心家藏賜書篋

金遜其胎厥披覽神勝吟調知厚

初學記二十一藝文類聚五十五

謝隨王賜紫梨啟

味出靈關之陰旨珍玉津之莖豈徒真定歸美大谷慚滋將恐帝

臺妙棠安期靈棗不得孤擅玉盤獨甘仙席雖秦君傳器漢后推

滄望古可儔於今何答

藝文類聚八十六初學記二十八

齊明皇帝謚冊文

維永泰元年九月朔日哀子嗣皇帝諱仰惟太行皇帝早棄萬邦

聖烈方遠式遵帝世俾罔鴻猷咸已為無名以化則言繁莫宣其

道有求斯應則影響庶同

藝文類聚作國

其功所以永言配命寄心宗極

允昭令德允樹風聲伏惟大行皇帝合信四時齊明日月創光大

藝文類聚作保文

於登庸通神機

藝文類聚作機神

於受命因時以暢藉九萬而

輕舉天保既定運四海而高臨及迺開物成務重維國綱

藝文類聚作紐

風行草化心往如神左賢右戚內樂外禮輯五材以教民申三驅

而在肴川能盛德殷薦美善斯畢早矣之業既孚然哉之道咸備
景化方遠朕世在天龜筮告期遠日無改仰則前王俯詢百辟累
德彌眷允極鴻名謹命某甲奉太牢之奠謹上尊諡曰明皇帝廟
號高宗天人允協神其尚饗嗚呼哀哉

藝文類聚十四文苑
英華八百三十五

齊敬皇后哀策文

惟永泰元年秋九月朔日敬皇后梓宮啟自先塋將祔於某陵其
日至尊親奉奠某皇帝乃使兼太尉某設祖於行宮禮也翠帟舒
卓玄堂啟扉俎徹三獻進卷六衣哀子嗣皇帝懷屈衛而延首想
驚輅而撫心痛椒塗之先廓哀長信之莫臨身隔兩赴時無二展
旋詔左言光敷聖善其辭曰

帝唐遠胄御龍遙緒在秦作劉在漢開楚肇惟淑聖克柔克令清
漢表靈曾沙膺慶爰定厥祥微音允穆光華沼沚榮曜中谷敬始
緘經教先種睦容問川流神襟蘭郁先德韜光君道方被於佐求

賢在謁無談顧史弘式陳詩展義厚下日仁藏往伊智十亂斯俟
四教罔忒思媚諸姑貽我嬪則化自公宮遠被南國軒曜懷光素
舒仁德閔予不祐慈訓早違方年冲藐懷寢靡依家臻寶業身嗣
昌暉壽宮寂遠清廟虛歸嗚呼哀哉帝遷明命民神胥悅乾景外
臨陰儀內缺空悲故劍徒嗟金穴璋瓚奚獻禕褕罔設嗚呼哀哉
馮相告祓宸居長往貽厥遠圖末命是獎懷豐沛之綢繆兮背神
京之弘微陋蒼梧之不從兮遵鮒聞以同壤嗚呼哀哉陳象設於
園寢兮映輿鏤於松楸望承明而不入兮度清洛而南遊繼池綽
於通軌兮接龍帷於遺舟迴塘寂其已暮兮東川澹而不流嗚呼
哀哉藉闕宮之遠烈兮聞繼女之遐慶始協德於蘋蘩兮終配祇
而表命慕方纒於賜衣兮哀日隆於撫鏡思寒泉之罔極兮託形
管於遺詠嗚呼哀哉

文選類聚
十五初學記十

臨海公主墓志銘

長發有祥，瑤臺乃構。玄鳥歸飛，北音斯奏。邇來徐土，頌符爰授。帝
體靈柯，穠華以秀。飾節東魯，言歸景族。有教公官，無繫車服。既肅
簪珥，亦崇湯沐。率禮衡門，降情雲屋。彼月斯望，在鈞維緒。瞻須配
景，望燭齊神。耀華崑岬，滅采上春。慈纏雪陛，悲動外姻。鬱彼崇芒，
睠然城隤。輜翟按轡，龍旒徐轉。藝文類聚十六

新安長公主墓志銘

氛氲長發，時惟睿文。誕茲明淑，玉振蘭芬。譽宣女師，德侔高行。肅
穆嬈風，優游圖正。撫事成箴，臨圖作鏡。如何冥默，方春委盛。藝文類聚

六十

齊鬱林王墓誌銘

綠車旖旎，翠綦掩映。癸貳戲良，臨眺弛盛。毀德歸桐，棄尊君鄭。藝文類聚四

十五

齊海陵王墓銘

中樞誕聖，膺厥受命於穆二祖，天臨海鏡，顯允世宗，溫文著性，三

善有聲，四國無競，嗣德方衰，時惟介弟，景祚云及，多難攸啟，載驟

輪獵，藝文類聚作載驟輪獵高闕代邸，庶辟欣欣，威儀濟濟，亦既負扈，言觀

帝則，正位恭己，臨朝淵默，虔思寶緒，負荷非克，敬順天人，高遜明

德，西光已謝，東旭藝文類聚作東旭又昇，龍蒸夕嚴，葆挽晨綱，風搖草色，

日照松光，春秋非我，晚夜藝文類聚作曉夜何長，夢溪筆談十五又見藝文類聚四十五有刪節

為諸婦祭阮夫人文

婉婉婦德，幽閒嬪性，明史弘箴，陳詩陳詠，嘉言足題，清暉可映，契

閭未幾，音塵如昨，中景遽傾，芳木先落，疇日交觴，享也虛薦，帶上

先結，握中遺扇，迸淚失聲，潺湲如露，藝文類聚三十八

為隨王榮東耕文

穀躋星景，穠表蜡先，八政奚首，六府茲宣，獎嗟非國，登頌有年，一

夫或怠，望歲誰天，藝文類聚二十九

祭大雷周何二神文

大過在運。小雅盡缺。瓊鏡日淪。金車未晡。周生電斷。神謨英冠。正
因部奇。風斂雲散。晉德如燬。功資叶贊。山無猛勢。時曠忠賢。流王
於旻。龜鼎忽焉。忠肅布衣。君親自然。驅狐上國。斬鯢中川。紛綸凱
入。氛氲配天。藝文類聚
七十九

賜進士出身三品銜廣東等處提刑按察使司按察使兼管驛傳事務南國王統漢校刊

全齊文卷二十三終

全齊文卷二十四

烏程嚴可均校輯

王祐

祐永明初太學博士

南郊明堂異日議

來年正月上辛宜祭南郊次辛有事明堂後辛饗祀北郊

南齊書禮志上

永明二年

劉蔓

蔓永明初兼博士

南郊明堂異日議

漢元鼎五年以辛巳行事自後郊日略無違異元封元年四月癸卯登封泰山坐明堂五年甲子以高祖配漢家郊祀非盡天子之縣故祠祭之月事有不同後漢永平以來明堂兆于國南而郊已

上下故供修三祀得並在初月雖郊有常日明堂猶無定辰何則郊丁社甲有說則從經禮無文難以意造是以必算良辰而不祭寅丑且禮之奠祭無同共者唯漢以朝日合于報天爾若依漢書五供便應先祭北郊然後明堂則是地先天食所未可也

南齊書禮志上

永明二年

亥日藉田議

禮孟春之月立春迎春又于是月以元日祈穀又擇元辰躬耕帝藉盧植說禮通辰日日甲至癸也辰子至亥也郊天陽也故以日藉田陰也故以辰陰禮卑後必居其末亥者辰之末故記稱元辰法曰吉亥又據五行之說木生于亥以亥日祭先農又其義也

南齊書禮志上永明三年太學博士劉夢議

蔡仲熊

仲熊濟陽人永明初兼太常丞累官至尚書左丞

南郊明堂異日議

鄭志云正月上辛祀后稷于南郊還于明堂以文王配故宋氏創立明堂郊還卽祭是用鄭志之說也蓋爲志者失非立意也玄之言曰未審周明堂以何月于月令則以季秋案玄注月令季秋大饗帝云大饗徧祭五帝又云大饗于明堂以文武配其時秋也去殷蟄遠矣又周禮大司樂凡大祭祀宿縣尋宿縣之旨以日出行事故也若日間而後行事則無假預縣果日出行事何得方俟郊還東京禮儀志不記祭之時日而志云天郊夕牲之夜夜漏未盡八刻進熟明堂夕牲之夜夜漏未盡七刻進熟尋明堂之在郊前一刻而進獻奏樂方待郊還魏高堂隆表九日南郊十日北郊十一日明堂十二日宗廟案隆此言是審于時定制是則周禮二漢及魏皆不共日矣禮以辛郊書以丁祀辛丁皆合宜臨時詳擇

紀德真

德真，爵里未詳。

造釋迦石像記

齊永明二年甲子太歲甲子四月廿日，弟子紀德真爲亡弟僧惠敬造釋迦石像，追往悼心，泣深友愛，願僧惠齊神離苦，永與福會。七世亡靈，同生淨土，見在眷屬，長保吉口。家門雍睦，子孫昌熾，願果遂亨，善無窮口。口口使蜀于涪陵喪思寺，就穎法師造。古刻叢鈔

孔琇之

琇之，會稽山陰人。宋光祿大夫季恭孫。初爲國子生，舉孝廉，除衛軍參軍員外郎，尚書三公郎，出爲烏程令，遷遷通直郎，補吳令，遷尚書左丞，轉前軍將軍，兼少府，遷驍騎將軍，出爲寧朔將軍，明帝冠軍征虜長史，江夏內史，還爲正員常侍，兼左民尚書，廷尉卿，出爲臨海太守，又爲輔國將軍，監吳興郡，尋拜太守，隆

昌初遷監朔將軍、晉熙王冠軍長史、江夏內史。

表王文殊

文殊性挺五常，心符三教，以父沒，撫庭抱終身之痛，專席恆居，倚罔極之卹，服紵縞以經年，飢蔬菽以俟命，婚義滅于天情，官序空于素抱，儻降甄異之恩，膺其閭里。

南齊書孝義王文殊傳。文殊吳興故鄉人。永明十一年太守孔

瑋之表云：云鬱林詔牘門改所居爲孝行里。

庾杲之

杲之字景行，新野人，爲奉朝請，累遷尙書左丞、黃門郎、御史中丞、太子右衛率，加通直常侍。永明九年卒，諡曰貞子。

臨終上表

臣昨夜及旦，更增氣疾，自省綿痼，頃刻危殆，無容復臥，任居隆顯，玷塵明世，乞解所忝，待終私庭。臣以凡庸，謬徵昌運，獎擢之厚，千載難逢，且年踰知命，志事榮顯，修天有分，無所厝言。若天鑒微誠，

暫借餘厯。傾宗殞元。陳力無遠。仰違庭闕。伏枕鯁戀。送貂蟬及竟。
南齊書庾

果之傳

爲竟陵王致書劉隱士

司徒竟陵王懋于神者。言象所絕。接乎事者。遠近所宗。鍾石非禮
樂之本。纓褐豈朝野之謂。想閭投之懷。不以形骸爲阻。一日通籍
梁邸。親奉語言。夢想清顏。爲歲已積。以丈人非羔雁所策。故息蒲
帛之典。勝寄冥通。諒有風期之遲。君坐卜居郊郭。縈帶川阜。顯不
徇功。晦不標迹。從容人野之間。以窮二者之致。且弘護爲心。廣敷
真俗。思聞繫表。共剖眾妙。武筵山河。虛館川渙。寶望貴然。少酬側
遲。昔東平樂善。旌君大于東閣。昔王愛素。致吾子于西山。豈不盛
歟。百齡飄驟。凝滯自物。千載一期。爲仁由己。且陵雪戒途。非滅跡
之效。鴻鍾在御。豈銷聲之道。已標異人之迹。固有同物之勞。豈山
水無情。應之以會。愛問在我。觸地蕭條。衡嶽何親。鍾山何薄。想弘

思有在不俟繁言

廣弘明集十九

殷瀾

瀾永明中爲南豫州別駕

請以廬江屬南豫牒

潁川汝陽荒殘來久流民分散在譙歷二境多蒙復除復有郡名
租輸益微府州絕無將吏空受咎領終無實益但寄治譙歷于方
斷之宜實應屬南豫二豫亟經分置廬江屬南豫濱帶長江與南
譙接境民聚租帛從流送州實爲便利遠踰西豫非其所願郡領
譙舒及始新左縣村竹產府州採伐爲益不少府州新創異于舊
藩資役多闕實希得廬江請依昔分置

南齊書州郡志上永明七年南豫州別駕殷瀾稱云

云尙書參議宜依所牒詔可

何謹之

謹永明中爲太常丞

亥日藉田議

鄭注云元辰蓋郊後吉亥也亥水辰也凡在墾稼咸存灑澗五行說十二辰爲六合寅與亥合建寅月春耕取月建與日辰合也

書禮志上永明三年太常丞何謹之議

祭用鮮槁魚議

今祭有生魚一頭干魚五頭少牢饋食禮云司士升魚腊膚魚用鮓十有五上既云腊下必是鮓其數宜同稱膚足知鱗革無毀記云槁魚曰商祭鮓曰脰祭鄭注商量脰直也尋商旨裁截脰義在全賀循祭義猶用魚十五頭今鮓頓剛約槁皆全用謂宜鮮槁各二頭槁微斷首尾示存古義

南齊書禮志上永明六年太常丞何謹之議

服章議

案周禮命數改三公八旒卿六旒

南齊書輿服志永明六年

功臣配饗坐板議

功臣配饗累行宋世檢其遺事題列坐位具書贈官爵諡及名文
不稱主便是設板也白虎通云祭之有主孝子以繫心也揆斯而
言升配朝廷不容有主宋時板度既不復存今之所制大小厚薄
如尚書召板為得其衷有司攝太廟舊人亦云見宋功臣配饗坐
板與尚書召板相似事見儀注南齊書禮志上永明十年詔褚淵
民六人配享太祖廟
庭祠部郎何譔之議

桑惠度

惠度永明中為國子助教

亥日藉田議

尋鄭玄以亥為吉辰者陽生于子元起于亥取陽之元以為生物
亥又為水十月所建百穀賴茲沾潤畢熟也南齊書禮志上永明
三年國子助教桑惠

議度

難何譔之祭用鮮槁魚議

記稱尚玄酒而俎腥魚玄酒不容多鮮魚理宜約干魚五頭者以其既加人功可法于五味以象酒之五齊也今欲鮮槁各雙義無所法

南齊書禮志上永明六年

顧嵩之

嵩之字士明吳人永明中爲殿中郎歷安西諮議兼著作建武初以疾歸

亥日藉田議

鄭玄稱先郊後吉辰而不說必亥之由盧植明子亥爲辰亦無常辰之證漢世躬藉肇發漢文詔云農天下之本其開藉田斯乃草創之令未覩親載之吉也昭帝癸亥耕于鉤盾弄田明帝癸亥耕下邳章帝乙亥耕定陶又辛丑耕懷魏之烈祖實書辛未不繫一辰徵于兩代矣推晉之革魏宋之因晉政是服膺康成非有異見者也班固序亥位云陰氣應亡射該藏萬物而雜陽閤種且亥既

水辰含有爲性播厥取吉其在茲乎班固序丑位云陰大旅助黃鍾宣氣而牙物序未位云陰氣受任助稊實君主種物使長大茂盛是漢朝迭遷魏室所遷附舊用丑實兼有據南齊書禮志上永明三年殿中郎顧

講之
王摛

摛東海郟人永明中爲秣陵令累遷永陽太守建武中進尚書左丞永元中爲國子博士

郊壇瓦屋議

埽地而祭于郊謂無築室之議南齊書禮志上建武二年兼左丞王摛議

駁何佟之明堂配饗議

孝經周公郊祀后稷以配天宗祀文王于明堂以配上帝不云武王又周頌思文后稷配天也我將祀文王于明堂也武王之文唯執競云祀武王此自周廟祭武王詩彌知明堂無矣南齊書禮志上永元二年

國子博士
王摛議

陸厥

厥字韓卿吳郡吳人太常惟從子永明中舉秀才歷少傅王宴
主簿遷後軍法曹參軍有集十卷

與沈約書

范詹事自序性別宮商識清濁特能適輕重濟艱難古今文人多
不全了斯處縱有會此者不必從根本中來尚書亦云自靈均以
來此祕未覩或閤與理合匪由思至張蔡曹王曾無先覺潘陸顏
謝去之彌遠大旨鈞使宮羽相變低昂舛節若前有浮聲則後須
切響一簡之內音韻盡殊兩句之中輕重悉異辭既美矣理又善
焉但觀歷代眾賢似不都聞此而云此祕未覩近於誣平案范云
不從根本中來尚書云匪由思至斯可謂揣情謬於玄黃摘句差
其音律也范又云時有會此者尚書云或閤與理合則美詠清謳

有辭章調韻者。雖有差謬。亦有會合。推此以往。可得而言。夫思有合離。前哲同所不免。文有開塞。卽事不得無之。子建所以好人譏彈。士衡所以遺恨終篇。旣曰遺恨。非盡美之作。理可詆訶。君子執其詆訶。便謂合理爲闇。豈如指其合理。而寄詆訶爲遺恨邪。自魏文屬論。深以清濁爲言。劉楨奏書。大明體勢之致。咀嚙妥帖之談。操末續顛之說。與玄黃於律呂。比五色之相宣。苟此祕未覩。茲論爲何所指邪。故愚謂前英已早識宮徵。但未屈曲指的。若今論所申。至於掩瑕藏疾。合少謬多。則臨淄所云人之著述。不能無病者也。非知之而不改。謂不改則不知。斯曹陸又稱竭情多悔。不可力彊者也。今許以有病有悔爲言。則必自知無悔無病之地。引其不了不合爲闇。何獨誣其一合一了之明乎。意者亦質文時異。古今好殊。將急在情物。而緩於章句。情物文之所急。美惡猶且相半。章句意之所緩。故合少而謬多。義兼於斯。必非不知明矣。長門上林。

殆非一家之賦洛神池雁便成二體之作孟堅精整詠史無虧於東主平子恢富羽獵不累於憑虛王粲初征他文未能稱是楊修敏捷暑賦彌日不厭率意寡尤則事促乎一日發露愈伏而理賒於七步一人之思遲速天懸一家之文工拙壤隔何獨宮商律呂必責其如一耶論者乃可言未窮其致不得言曾無先覺也

南齊書陸厥傳南史陸厥傳又略見藏文類聚五十八

暴母珍之

珍之鬱林時領中書通事舍人封汝南縣侯後謀誅蕭詵事敗死

自牒求封

當世祖晏駕之時內外紛擾珍之手抱至尊口行處分忠誠契闊人誰不知今希千戶侯於分非過

南史

李機

揭永明中爲博士建武初爲祠部郎太常丞

朝堂誦榜議

據周禮凡有新令必奮鐸以警眾乃退以憲之於王宮注憲表懸

之也

南齊書王慈傳

郊壇瓦屋議

周禮凡祭祀張其旅幕張尸次尸則有幄鄭仲師云尸次祭祀之

尸所居更衣帳也凡祭之文既不止於郊祀立尸之言理應關於

宗廟古則張幕今也房屋宗廟旅幕可變爲棟宇郊祀毳案何爲

不轉製檐簷

南齊書禮志上建武二年祠部郎李憺議通典四十二作李憺疑誤

泄哀儀議

尋尊號既追重服宜正但已從權制故苴杖不說至於鑽燧既同

天地亦變容得無感乎且晉景獻皇后崩羣臣備小君之服追尊

之后無進后典追尊之帝固宜同帝禮矣雖臣子一例而禮隨時

異至尊龍飛中興事非嗣武理無深衣之變但王者體國亦應弔服出正殿舉哀百僚致慟一如常儀

南齊書禮志下建武二年正月太常丞李瑒議

賜進士出身二品銜廣東等處提刑按察使司按察使兼管驛傳事務黃岡王毓藻校刊